

Jahresbericht des Präsidenten für das Vereinsjahr 2022

Als hoffentlich letschtä grössärä Ifluss vo Corona uf üsän Verein ischs Vereinsjohr 2022 am 20. Mai später als planät losgangä. Somit han ich au e Usred zum mich bitz kürzer z fassä....

Das isch do min erschtä Bricht als Präsident und ich möchtis a derä Stell nöd unterloh gad mol zerscht Dankä z sägä. Erstens am Beat für die Umfassendi Dokumentation vo siner langjährigä Arbet und au di witeri Unterstützig wenni Frogä oder so han. Zweitens aber au minä Vorstandskollegä und am Leiterteam wo mich noch wiä vor bim Schwimmtraining i dem kaltä Wasser woni do dri gsprungä bin unterstützt. Es macht echt Spass i dem Team.

Aber jetzt zruck zum Johresbricht. Über die turnerischä Aläss wird nochher wiä immer vom Sepp und vom Roland brichtät.

Wiä bereits ahtönt hät de Turn und Trainingsbetrieb i dem Brichtsjohr, im Gegäsatz du de vergangänä, chennä Wiä geplant und ohni Ihschränkidä durägführt werdä..

Im Juni hät z Balterswil ds Nordostschwizerische Schwingfest NOS stattfundä. Einige vo üs händ a dem Fäscht Helferisätz zu Gunstä vo üsäm Verein gleistet. Denä und ebäfalls wieder Am Beat wo das no koordiniert hät gilt a derä Stell en grossä Dank für Ihren Isatz.

Nochher isch es Schlag uf Schlag wifers gangä. Am 2./3. Juli simmer mitänand uf Frutigä as Turnfescht. De Höhepunkt isch det sicher d Barräsektion gsi mitem wohrschinli höchstchä Altersdurchschnitt. Isch cool gsi, di Altä Grätturn-Hasä mol wieder im Ernstkampf z gseh, und dass glich bim aintä oder anderä bitz ä Nervosität ufcho isch..... di aintä händ sich quasi es Sudoku mit ihrnä Zitä müssä ufs Handglenk zeichnä....

Ebäfalls lässig isch gsi, dass sich das Spektakel so einigi nöd händ wellä entgoh loh... und mir ä schöni Fanschaar gha hend. Das ganze Fäscht isch durch und durch super gsi.... Vom Wettkampf.... Wo eu dä Sepp meh verzehlt, über de gselligi Teil und die eint oder ander lustig Anektotä wo entstandä isch, bis denn zum Zuäluägä bi dä bitzli andärä Staffettä vom Turnverein.

Am Mittwoch nochem Turnfäscht isch denn bereits d Saison vom Andy Zuber, üsäm neuä Verantwortlichä Anlässe losgangä mitem Grillobig. I de Köhlerhüttä Balterswil händ mir en gmütlichä Obig mit Steaks und Salät gha..... Und ä Wuchä später isch denn scho mitem jöhrlichä Minigolf in Matzingä witergangä.

Dä August isch denn Mit de Volleynights vom Turnverein und em Thurgauer Spieltag in Aadorf, im Zeichä vom Volleyball gstandä.

De ainti oder anderi isch a de Volleynights meh oder weniger Spontan am Grill oder ufem Schwedekastä als Schiri ihgsprungä zum de TV unterstützä, was sie üs den id Männerturnvereinskassä vergütät hend.

Under dä Regie vom Thomas Knopf und em Andi Zuber simmer am 18. September uf ä tägigi Turnfahrt. Mitem Car isch losgangä uf Pfyn zumä Brunch im Cafe Bürgi. Noch dem denn Alli Wach und gstärkt gsi sind, simmer Wifers uf d Fuässballgolf-Alag in Müllheim. Das muss mer sich wiä ä

überdimensionierti Minnigolfalag vorstellä und isch aso jedem z empfehlä das mol z probiärä. Aschlüssend simmer denn witer as Oktoberfest in Konstanz und händ üs det di üblichä Köstlichkeitä gönnt.

Dankä dä Organisatorä für de Tag.

Im Oktober sind denn mitem Bowling in Rümikon und em gmeinsamä Herbstbummel mitem Turnverein zwei witeri Traditionsaläss ufem Programm gstandä. De Herbstbummel isch denn sim Namä leider nöd so gerecht, sondern fast zumä starttraining für de silvesterlauf worde. Do münd mir sicher bitz Ifluss neh dass das wieder eher zum gmüätlichä Bummel wird.

Am 3. November simmer denn, zemmä mit andernä Verein ihgladä gsi en Matsch vom HC Thurgau go luägä z goh. Äs Grüppli vom Männerturnverein hät diä lladig ahgnoh und isch vorem matsch im Strähl-Stübli go Raclette essä.

Dä Chlausobig hämmer denn uf Grund vo chli viel Abwesäheitä vom 26. November uf de 3. Dezember verschobä. Mer händ üs ir Aula z Walläwil troffä wo mir nochemä chlinä Aperö en Spaghettiplausch und Salot becho händ. De Chlaus hät am eintä oder anderä bitz is Gwüssä gredet, aber im Grundsatz ischer aso zfriedä gsi mit üs. Vielä dank am Andy Zuber für d Organisation vo dem Obig und notürli au allnä wo do mitgwirkt händ.

Ä Witeri Disziplin vom Rangturnä isch denn mitem Luftgewehrschüssä am 21. Dezember z Walläwil ustrait wordä. Leider hät das nöd we bis anhin üsäs Mitglied de Heinz Eggäberger chennä leitä, aber verdankänderwiis sind do zwei Mannä vo de Schützä ihgsprungä. Abgrundät hät de Alass es feins Fondue vom Ganti wo üs do wiederum en super Service botä hät. Au dir es grosses Merci. Obs etz Schüsse mit Fondue oder Fondue mit Schüsse isch a dem obig, isch jedem selber überloh.

Am Silvesterlauf hät au no de ainti oder anderi vo üs mitgmacht und aso no echt ahsprechendi Resultat zeigät. Vielleicht gits jo am nöchtschä Turnfäscht no e Laufdisziplin. Do wäri aso au no z ha defür.... Det zuäzluägä 😊

Turnerunterhaltung isch wegem Bächelackerumbau uf de 23.-26. November 2023 verschobä wordä. Für diä wos nonig gmacht hend: Termin reserviärä

Am 31. Januar isch denn mitem Cheglä z Wängi no di letschti Disziplin vom Rangturnä ustrait wordä. Do vieli vo eu i de Skiferiä gsi sind, simmer es exklusivs Grüppli vo 7 Mannä gsi wo do um de Disziplinäsieg kämpft hät. Au das Johr hämmer di letscht Rundi wieder mit de schwachä Hand gspielt, was au wieder öppä dä glichä (mir) id Kartä gspielt hät.

Etzt hämmer dä 10. Februar und sind do im Mettlähof a dä Jahresversammlig, und somit endet au min erschtä Johresbricht.

Für den Männerturnverein

Der Präsident

Peter Eberhard.